

**TEKS UCAPAN**  
**SETIAUSAHA PERBANDARAN**  
**MAJLIS SAMBUTAN HARI KITAR SEMULA KEBANGSAAN**  
**PERINGKAT SEBERANG PERAI & PERASMIAN PUSAT SUMBER**  
**ALAM SEKITAR PERKAMPUNGAN JAWI, SPS**  
**GELANGGANG BOLA KERANJANG PERKAMPUNGAN JAWI,**  
**SEBERANG PERAI SELATAN**  
**10 NOVEMBER 2013 (AHAD) JAM 12.30 TENGAH HARI**

---

**Yang Berhormat Tuan Chow Kon Yeow**

Ahli Majlis Mesyuarat Kerajaan Negeri Pulau Pinang,  
Merangkap Pengerusi Jawatankuasa Kerajaan Tempatan, Pengurusan  
Lalulintas & Tebatan Banjir

**Yang Berhormat Tuan Soon Lip Chee**

ADUN Jawi

**Yang Berusaha Ahli Majlis - Ahli Majlis**

Majlis Perbandaran Seberang Perai

**Ketua-Ketua Jabatan dan Pegawai**

Majlis Perbandaran Seberang Perai

Rakan-rakan Media

Tuan-Tuan, Puan-Puan hadirin yang dihormati sekalian,

**Assalamualaikum Warahmatullahi Wabarakatuh dan**

**Salam Sejahtera**

Alhamdulillah, saya bersyukur ke hadrat Allah s.w.t. kerana dengan limpah dan kurnianya dapat kita sama-sama berhimpun pada tengah hari ini dalam Majlis Sambutan Hari Kitar Semula Kebangsaan Peringkat Seberang Perai. Saya amat berbesar hati untuk hadir bersama saudara dan saudari pada hari ini kerana bagi saya, pemeliharaan alam sekitar, dan seterusnya amalan kitar semula, merupakan satu perkara yang amat penting sekali dalam usaha kita untuk mencapai pembangunan yang sustainable, berkualiti dan seimbang.

Untuk Makluman Tuan-tuan dan Puan-puan,

Sambutan Hari Kitar Semula Kebangsaan Peringkat Seberang Perai adalah untuk memberi penghargaan kepada komuniti penggiat kitar semula kerana telah mempamerkan amalan baik bagi pengurangan sisa buangan. Hari Kitar Semula peringkat kebangsaan disambut pada tanggal 11 November setiap tahun bermula pada tahun 2000, Malaysia telah secara rasmi menyambut Hari Kitar Semula Peringkat Kebangsaan dengan objektif utama untuk memupuk kesedaran masyarakat untuk mengamalkan kitar semula. Majlis sambutan ini turut mendapat sokongan daripada Y.B.

Tuan Soon Lip Chee dan Ahli Majlis Encik Micheal Tan, Encik Jason H'ng dan Encik Loo Joo Huat yang merupakan tulang belakang program ini.

Hadirin yang dihormati sekalian,

Dalam kehidupan kita sehari-hari banyak perkara yang boleh kita lakukan untuk menyelamatkan bumi dari terus binasa oleh sampah sarap yang dibuang oleh manusia. Pada masa ini lebih 50% daripada sampah yang dipungut oleh MPSP adalah daripada sisa organik. Ini merupakan suatu jumlah yang agak tinggi dan amat membimbangkan. Pengurangan sisa organik seperti ini dapat membantu mengurangkan kepanasan global. Kita perlu menghadapi cabaran dengan pertambahan sampah setiap hari, konsep 4R (Rethink, Reduce, Reuse and Recycle) haruslah diamalkan dan menjadi budaya hidup kita. Walaupun sukar untuk kita mengubah cara pemikiran bagi pengurangan penggunaan dan menghadapi banyak rintangan terhadapnya, namun MPSP akan terus berusaha sedaya-upaya menuju ke arah sisa sifar.

Pihak Majlis Perbandaran Seberang Perai (MPSP) amat berbesar hati menganjurkan program-program yang bertujuan memelihara dan memulihara alam sekitar. Justeru, aktiviti-aktiviti seperti *urban farming*, *zero waste*, *composting*, kitar semula, gotong-royong kebersihan dan lain-lain adalah sebahagian dari usaha melindungi alam semula jadi. Melalui program-program yang telah dijalankan, MPSP mencapai kadar kitar semula 32% pada tahun ini berbanding dengan sasaran iaitu sebanyak 31%. Program-program seperti ini adalah sejajar dengan motto kerajaan negeri iaitu *Cleaner, Greener, Safer, and Healthier* untuk menjadikan Pulau Pinang sebagai negeri yang bersih dan hijau.

Para hadirin sekalian,

Tahniah dan syabas saya ucapkan kepada Yang Berhormat Tuan Soon Lip Chee kerana telah berjaya menubuhkan pusat sumber alam sekitar yang pertama di Perkampungan Jawi walaupun baru enam bulan dipilih menjadi ADUN Jawi. Saya harap YB Soon akan meneruskan lagi kecemerlangan beliau dengan menubuhkan lebih banyak pusat yang berkaitan dengan alam sekitar seterusnya dapat mendidik warga Seberang Perai akan kepentingan alam sekitar terhadap manusia sejagat. Di kesempatan ini

saya ingin menasihati penduduk Perkampungan Jawi agar memaksimumkan penggunaan pusat sumber ini demi kepentingan masyarakat setempat.

Perkampungan Jawi pernah menyertai program kutipan sisa organik untuk kompos (CIMB) pada tahun lalu. Saya difahamkan bahawa selepas tamat program tajaan CIMB tersebut, penduduk Perkampungan Jawi masih meneruskan usaha untuk menjaga keindahan Perkampungan Jawi. Ini menunjukkan penduduk Perkampungan Jawi mempunyai kesedaran yang tinggi dalam penjagaan alam sekitar dan amalan ini patut dicontohi oleh penduduk kampung yang lain. Syabas saya ucapkan pada penduduk Perkampungan Jawi. Saya harap Jawatan Kuasa Keselamatan Kampung (JKKK) dapat membantu mengumpul maklumat supaya usaha murni penduduk Perkampungan Jawi dapat direkod dan seterusnya dapat memberi penghargaan kepada penduduk Perkampungan Jawi.

Hadirin sekalian,

Pihak Majlis Perbandaran Seberang Perai (MPSP) sedang merancang untuk menjadikan Seberang Perai sebagai Low Carbon City dengan mempromosikan pengasingan sisa di punca. Barang-barang yang boleh

dikitar semula akan dikumpulkan bagi tujuan kerja amal dan sisa organik akan dijadikan kompos.

Para hadirin sekalian,

Saya bagi pihak MPSP mengucapkan ribuan terima kasih kepada semua pihak yang bersama-sama menjayakan program pada hari ini dan membantu MPSP untuk menjadikan Seberang Perai bersih, indah dan selesa didiami. Marilah kita bersama-sama menjadi satu masyarakat yang sangat prihatin terhadap kepentingan memelihara dan memulihara alam sekitar dan terlibat secara aktif dalam menjayakan program kitar semula.

Sekian, Wabillahi Taufik Wal Hidayah, Wassalamualaikum Warahmatullahi Wabarakatuh.

Terima kasih.